

孝行忠義并節婦錄

朝邑志卷六

孝友

明

張士榮字仁亨母韓氏苑洛子女也幼以孫育於韓有至性苑洛撫晉陽歸忽感疾坐中堂命士榮召汝祖母語士榮初不知對曰祖入耳祖母固不出也苑洛氣不屬曰我病士榮驚仆地口鼻盡血卽匍匐行告祖母其祖母陡視士榮狀又聞苑洛病狀亦驚仆士榮出視祖入視祖母奔走號呼淚血滿膺食頃苑洛病蘇士榮曰果愈耶抑安我耶聞苑洛呼曰粥來乃大喜旣冠補弟子員仍侍苑洛宦京邸歲丙午祖母病士榮晝夜侍湯藥命歸應秋試不行苑洛怒治裝嚴遣之士榮跽請曰祖母病而欲從事功名可乎因伏地哭苑洛亦泣聽之及病亟士榮割

朝邑志卷六

一

股肉進又嘗糞甜苦以驗瘵否卒不起士榮扶柩抵家登涉三千里暮露宿柩旁旣葬考古禮行義服三年士榮歷覽羣書尤精書易凡律歷度數樂器龜卜方藥之屬悉出苑洛指授年二十有八卒

忽麒孝親廬墓奉旨旌表

王于豐字啓文授光祿署丞與弟上林監丞于鎬親喪廬墓三年朝夕泣奠有雙鶴哀鳴舞於墓前荒年出粟賑濟鄉人肖像祀之又李仁邑諸生廬於墓側時渭水漲溢者四仁運土築護墓得無損又諸生張奠極親歿劉宏禹祖母歿俱廬墓三年趙天好親歿負土築塚廬墓三年有司旌其門

嚴思慎忽以恒雷珍俱友愛嚴教諭略陽盡讓父產於弟後子廷選舉天啓甲子鄉試忽訓導長山親歿後亦讓家財於其弟

所著有限田議等書雷邑諸生初嗣於姑爲白西川後白旣生子送其終乃以其產與白身歸雷亦讓產於弟初珍學於忽以恒以恒因高其義以女妻之子開祉郟縣訓導

雷捷父邦命邑諸生萬歷三年攜少男小哲同旋子尚耀自山東歸至鄭州尚耀糾燕豫間賊七人絞殺邦命父子分橐中裝是日大風尚耀還以詭詞誑捷而言其情於家小女絨兒竊聽之一日女與鄰女嬉忽大風絨兒曰我君言殺小哲時便是者風由此事洩捷時年十五乃具訴往來三省歷十有三年竟並得其七賊戮之輿二尸還葬捷孫王寶邑生員執親喪期年不茹菜果三年不御酒肉居祠下朝夕哭奠如禮人稱世孝

劉世澤諸生父裔山西廣靈知縣攝廣昌篆昌邑舊多浮派裔申請捐除爲奸吏李承芳所害櫬歸承芳漏網世澤痛父事未

朝邑志卷六

二

白憤不欲生潛至廣昌歷愬臺司具得承芳罪狀磔於市昌邑人感動建祠祀其父世澤歸時年方十七耳

諸生張疇五貢生王元灝俱孝事其親歿則廬墓三年不御酒肉又薛國光孝事繼母病則衣不解帶者數月壬申饑捐米助賑縣旌其門

解國泰其祖一秋兄弟自明嘉靖間同居世以孝友稱及國泰從兄子宗仁生孫計已七世猶內外雍睦無間言焉

本朝

雷代述字知化樂豐里人父甲萬母楊氏述甫數齡授小學已曉大意十一歲值歲飢父就食河南卽能負米數十里外以奉母嗣因弟早逝脊令抱痛勤苦益力一蔬一果必親自檢點然後進之父母稍暇輒親課其子早夜無寧時父母每憐其過苦

邑人徐君萬龍述之密友也偶於冬月至其家見積雪擁門啓視則方擁絮於床琅琅誦書不輟餘地皆雪愕然曰兄一寒至此乎因言父母謂我農學兼務太苦若兄館於我家父母必喜徐慨然不辭由是教子有所托而事親亦得左右無違承顏順志終身不衰父母歿哀毀骨立運石營壙負土築墳廬墓三年滋味未嘗入口每食跪奠必哀服闋猶不忍居內於父在時所居易安洞旁築小洞寢食觀書不預外事惟徐君從靖遠司訓歸與共臥榻信誼老而彌篤乾隆八年建坊旌表純孝年八十三卒子三長長綱太學生奉養繼母食必親嘗人稱其孝歿後亦廬墓三年守制一如其父里人欲上聞堅辭次長維爲叔嗣三長緝庚辰舉人孫元春億春俱諸生

張魁爵六歲母亡比長孝事繼母不殊所生其父患癱疾色養

朝邑志卷六

三

備至日侍左右迨父歿哀痛號泣勺水不進三日廬墓三年盡孝盡禮乾隆五年旌表建坊弟魁祿病治用人糞弟覺不飲爲之先嘗蒲坂鄭某遇兇人命在旦夕往救得免里中有貧乏者負欠莫能償爵竭囊相助毫無德色年八十八而卒

宋斗五歲喪母哀毀骨立弱冠父瞽家貧如洗傭工奉親父老病臥床湯藥親嘗衣不解帶及歿竭力以營喪葬呼號泣血盡禮盡哀乾隆五年旌表建坊

雷復震王家莊人生而穎悟喜讀易精於卜筮性孝友定省如禮父老多疾身侍湯藥未嘗少離及父歿移柩外室奉遺像設衣冠朝夕哭奠足不出戶者二年旣葬廬於墓所三年不茹葷不入寢時尚未舉子親友有勸歸者輒號泣不已五年未髮長蔽而服將闋母喪繼之廬墓如前比三週禫祭畢卽於是日無

病而逝

陳根林子王謙村人幼而知孝五歲失恃父以貧傭工惟祖是依年十六其祖病奄奄不起飲食俱廢一日忽思食肉嘆曰爾父不在爾又無錢奈何根林潛取剪割其左臂忍痛和羹以進未幾祖病差已亦無恙祖年八十一而終先是根林事里中嘖嘖稱異越二年村人有党貴孝者母病劇三晝夜呻吟反側貴孝抱之母呼曰兒救我兒救我貴孝益不自安乃自悼曰根林以維子療祖疾吾年逾五十而視母斃何以生爲於是焚香禱神割股和藥以遺之母竟安眠次日卽愈蓋孝之感人如此根林名養信事在乾隆三十四年貴孝事在其後

靳茂湘王謙村人性孝友遭父喪哀毀骨立旣葬負土築墳廬於墓側逾年哭泣成疾家人謀歸諸室因親隣以告湘泣曰君

朝邑志卷六

四

子愛人以德公等何辱勸焉卒終其喪邑主事張公稱之曰賦性溫良克敦孝友縉紳之家殆不及也里中高其行欲白之官辭曰以傷心之事而得名將焉用之遂不果舉家居瀕洛乾隆丙子洛水溢室廬盡沒湘不顧其家獨抱親像而逃落坑塹中泥污其像涕泣數日王謙村故僻陋五十來無人泮者湘子煜弱冠采芹人以爲孝子之報云

陳玉堂邑庠生賦性仁孝事嗣母節婦張氏先意承志盡得歡心念母苦節不忍湮沒遵例請旌表建坊母病甚湯藥親嘗衣帶不解者三月餘迨母歿躡踊悲號數日不食形幾至毀葬後廬於墓側哀土益塚朝夕哭奠者三年其事生父溫清定省亦無間焉里中欲爲之請旌辭再三邑令王嘉其孝贈匾曰孺慕天成

白銳年十九隨父往運城販鹽歸逢天沔寒過黃河至中流船重不能行三日夜未得食父年邁不勝凍餒銳袒衣擁父冀死中得生風雪轉急父子俱斃焉及家人至驗尸銳仍抱父未解上官汝恢歲貢生有孝行以義服人里無爭訟嘗推田畝以窆貧不能葬者善教誨成就其子德輿壬子冠於鄉

雷篤萬字處厚增廣生幼喪母哀慕成疾事父尤謹友於兩弟修祠叙譜收恤宗族壬申歲祲出穀平糶賤其值好古文善書畫屢爲督學令長所嘉獎

董志恭邑庠生事其父生員玉柱侍疾忘寢居喪極哀六世同居無間言常出粟捐金以周貧乏學優品端鄉隣化之乾隆元年府縣薦舉孝廉撫軍額旌其閭

張愷歲貢生少失怙事祖母及母能孝授甘肅華亭訓導辭不赴爲社學長邑之人庠獲雋成進士者多出其門

朝邑志卷六

五

趙景淵字涵君保全里人事繼母孟氏二十餘年婉言愉色如一日母素嚴重家人偶有觸忤輒不食淵必跪而請解俟怒息始安撫異母弟友愛有加鄉党咸稱之好讀書至老不倦年八十有四長子光國長孫東曦曾孫鍾俱諸生

郝鳳翎字瑞文辛莊里人孺慕根於天性平居遇事雖至急必於父母前奉事無違而後應親歿廬墓側朝夕泣奠不苟葦者三年府縣俱旌表其門子必千邑諸生恬靜謹默立心積學能承親志於未形親沒亦廬墓三年執親之喪父子如一

楊九容南陽洪人乾隆甲午武舉遭繼母數凌辱幾致之死容順受無怨言曲意侍奉務令悅懌尤爲世俗所難宗族鄉黨咸嘆服焉

關暹望仙觀人粗知詩書而性孝其父年踰七十奉養備至夜必同寢晝必同行不少離者十有五年父歿哀毀骨立里人以其人微而忽之故特闡焉

馬常生趙啓村人父早亡母孀居撫之成人及長事母必誠必敬雖細事必稟請而後行母歿盡哀盡禮廬墓三年鄉黨稱之安五桂字聯芳又字蘭生號夔菴世居朝邑西王里父諱濟增廣生母員氏公生而稟資厚重賦性肫誠襁褓母亡乳於姑數年聞父病遽啼泣奔視洎歿哀動旁觀咸謂安氏有子矣竟年疏食巉然骨立時公方九齡耳繼母員早寡無出公色養曲盡得其懽心嘗從師讀書山中距家數十里夜忽心驚不寧欲歸師懼遇虎固止之昧旦而召公者果至師悚然曰山傾鐘應諒哉嚙指心痛也後員寢疾公獨力扶持形容枯癯不令家人更

代迨久奄牀褥回乾拭穢終無懈意自傷早孤其見叔如見父然以叔六旬無嗣力勸其續娶叔猝病暗所需藥物嘗繪像置叔前聽其所擇比卒服衰茹素如父喪以祖塋逼渭每河水發輒趨墓下跪曰不肖五桂所以不忍啓壙者冀河徙耳倘不能支行將敬遷矣早夜焚禱祈迴狂瀾仍伐木垂緘以維圯岸然卒改葬其曾祖伯仲厝地異塋子孫貧富不同享祀豐嗇亦異公念先人式好誼必合食分隆殺非先志也族人因是益睦遇先人忌辰則備物致虔竟日不怡四時薦品奉母與叔外卽進姑姑病革辦葬具爲展墓者三載痛外家乏嗣拜掃尤無虛歲其愷惻流溢類如是康熙壬寅歲飢公適市會將鬻子以償債公傾囊底物代償之其人請爲奴不許止畜於家凶年賴以存活願傭工二十年生子歸門下爲報歲稔伊叔來招之歸次子

當見留公碎券以示曰曷忍汝父子叔姪離析哉更給衣物贖之鄰鄉有爭田者久未決僉謂得公立界則且讓畔自公解紛五十餘年無侵爭蓋直諒足消險頗斯又其大概已公爲人氣度淵懿善容止嚴而能和人故畏而愛之自爲諸生苦志力學試輒前列乃數竒屢困識者惋惜教授里中來不言修售不言勞一時人材蔚起掇青拾紫實繁有徒蓋化導勤而曲成者善也嘗教子孫人必吉凶禍福一一聽諸命而後心不動人必不動心而後天下事可幹立身行道卽是顯揚不然則曾閔之論非歟乾隆元年詔察孝廉邑侯馮以公應公聞之瞿然嫌以子之孝掩母之節再三辭而後寢後郡伯張公延訪軼事復廉得其實曰此純孝也特筆編入府志申題請旌授七品章服

論曰夔菴先生早以孝行著聞光照鄰封余自弱冠稔其名嗣

因仰止華峰溯游洛岸渭濱間時一披帷親道範見先生終身孺慕之誠以爲心折竊嘆名不虛立士不虛附蓋先生實行孚人是以遠邇合辭譽不容口真堪傳記者矣余愧繭筆不足揚挖潛光自有秉筆者接踵而起奚取此詹詹者爲顧懿德之好心有同然因略次梗概爲採風者備菅蒯云

郭小兒陽昌村人父出外不歸初不知其死所旣廉知在河南某處奔走往尋之卒不得乃號哭數日以刀自披其腹而死嗚呼此愚孝也然其至性不可沒矣

黃潤邑庠生父天眷年老食必甘旨家屢空無所措潤竭力爲之預備以進而已嘗枵餒終身如一日父年八十卒哀痛悲號得疾而亡鄉人無不哀之稱爲孝子

劉朝善寺后社人未讀詩書天性純孝當父母在時溫清定省

極盡生事之禮及父歿年已五十廬墓四載每食必祭越十年母歿亦然營葬皆親執畚鍤故堅實逾常且廉介自持雖赤貧不受賙急之賜嘗負袋以拾字紙其以愚氓而佩服聖教者歟安養矩農夫也父歿廬於墓側三年每飯必祭親友以家無長丁勸令歸家守其父業弗聽邑令莊旌其門今矩年七十有五矣朝夕坐臥墓側四時薦新至性純篤有爲學士大夫所難能者

閔宁太學生賦性仁厚事繼母一如所生浣滌嘗藥備盡誠恪及母歿爲嬰兒慕泣不絕聲葬祭尤盡禮鄉黨稱孝焉

李學本姓張幼鬻李氏爲子家赤貧日荷鍤傭工所得錢必市甘旨以養親而自忍飢寒父歿日夜哭不絕聲感動隣里咸助殯殮之費遂得葬性慇直雖極困餓不受嗟來食年近八十寄

朝邑志卷六

八

跡空門無疾而卒

薛宗泗黃都村人例貢生母病禱於神刊施孝經千餘帙母尋愈及後母亡廬墓百日以病舁歸哭泣之聲數歷寒暑嘗遵母命捐輸社倉及賑濟穀共二百餘石又重刻韓恭簡公志樂新編王浚齋太極圖集解四禮慎行錄府縣屢加獎勵督學吳給敦本善俗額以旌之

張崇學新庄人性友愛兄典學頗嗜詩書一切家務崇力任之曰無妨吾兄功後兄病嘔血崇在外聞之倍道馳歸日視飲食親嘗湯藥病稍劇輒憂形於色衣不解帶者數年兄亡痛哭逾分鄉里重之

徐廷懋字與時邑諸生生而孝友家貧力農以供子職餘力學文康熙三十年大荒伯兄攜妻子就食南陽數月而亡訃聞冒

雪崎嶇奔兄喪甫還家其父已沒七日矣哀毀幾絕營葬後教養諸幼慈而有法勤於學殖康熙戊子科主司亟賞其文以微疵見斥士林惜之邑令楊嘗延爲鄉飲上賓

陳效曾邑諸生事親孝謹庭訓無違生母宋疾藥必親嘗衣不解帶者五年事繼母張氏數十年未嘗疾言遽色有病則左右扶持如事生母父歿朝夕哭臨營葬竭盡誠力葬後依戀墓側朔望哭奠不御酒肉三年

陳效固蔡莊村人農家子也有至性父疾病醫云不可爲矣固固哀之醫云試嘗其糞糞苦猶可固嘗之甘醫遂棄去固思人不能治神或可救乃詣城隍廟腰繫大索自縛藻井下以燈然指願以已年益父須臾指裂而殞有救者移時乃蘇後數日其父謂曰疇昔夢有人送馬於予俗云祿馬吾不死矣疾果愈後

六年乃卒卒時謂固曰汝繼母蘇多病幸善視之蘇故有篤疾支離牀褥間固妻偶失調護固卽撻之後蘇病革固乃持紙錢哭於父墓願延母壽因以紙錢自焚途人望見烟燄趨視之則固死矣舁歸救之復蘇母病亦少差後五年乃卒

楊素芝北石鐵營傭也歸家省母母疾革矣思食肉芝痛其貧乏無以供母聞人言人肉可愈疾乃夜自割其股因昏仆若聞旁有數人云速敷藥速敷藥須臾遂起乃炙肉而進母母果愈党夢鰲東平羅村人父歿廬墓三年未嘗歸家

高文煥龍池村人性至孝痛已服賈於外父母未盡孝養旦暮拜跪木主前四十餘年不輟子孫欲代之則嗚咽不聽家財僅足自給族有急必周荒歲屢出粟賑太守喬旌其門

張四翁相底村人性友愛待二弟如手足焉其妻死子欲爲漆

棺翁怒曰汝二叔死吾皆未能漆棺汝欲獨厚乃母乎家食指數百賈江南者四五人其一子又將往屬曰急令汝六弟歸蓋謂其從子也無何歸者乃其少子翁怒曰吾令汝六兄先歸汝胡來哉其子跪告以故怒始釋翁初爲儒先賢語錄講義皆手錄成數集繼因范文正公良相良醫之說遂學醫手抄醫書百卷療痘疹如神年老矣有迎者雖大寒暑必往子孫以爲言則應曰此非汝曹所知儲諸藥時或自採於山貧者取藥去若忘焉翁本名翬時人以其行皆稱爲張四翁云

白士琳士瑄兄弟國學生性至孝事繼母雷氏曲意承順士琳每遇母病輒不安如已病嘗雪夜數起潛伺幃側聽其聲息妻魏氏亦感而篤於孝雷氏疾數年不愈一日士琳他出神思忽瞽亂不知所從如聞人語曰汝急歸乃倉皇返室母病果劇人

朝邑志卷六

十

以爲純孝所感士瑄承顏悅志常學爲兒童戲於母前令母怡笑有老萊戲綵風焉

劉之元南馬村人事繼母王以孝稱王沒欲廬墓而無力三年不會客不食葷不入私室朔望哀號如初歿時

雷大俊字秀生元利子性孝友事父母就養無方以明經應京兆試薦不售謀所以榮其親乃循例授職得封贈其祖父或勸之就銓則曰吾年未及強仕而親老且善病服官之日正長奉親之日苦短何忍舍而去乎事其兄大柱情意周摯鄉人有慕而化之者見人有義舉及關係名節大端必多方獎勸且不惜已力以成其美錢塘張樞贈雷秀生詩駱馬歌倭遲靡鹽念將丈一以身許人溫清曠莫補叅軍抱逸才最怒數賈虎樂志伏衡門娛親效綵舞宦情非本疎至行爭快都爲誦君陳篇悠然

晤眉宇

嚴修已字敬淑東馬村人乾隆辛卯舉于鄉有孝行親沒不茹葷不晏客墓距學舍三里許日一往省哭奠如是者三年不懈因自號曰慕廬明其志也

路憲章字繼周阿石村人幼讀書以家貧去而業醫所得悉以奉親自甘淡薄親疾則藥必親嘗衣不解帶憂見於色迨歿附身竭誠力不用浮屠不作樂屏酒去葷客至亦供素饌葬後倚廬墓側朝夕哭三年不懈常有異鳥如鵲色純白每旦啁晰廬簷若哀之者邑令丁嘗表其宅里

義門

本朝

薛務本仁義村人八世男女同居共爨者六十餘口長幼肅序

朝邑志卷六

十一

俱以孝友勤儉爲訓寸絲半粟無私蓄家事條理井然不紊男有各甯之業女有易乳之風乾隆三十年 旌表建坊

王應佩堤澍村人邑諸生孝友傳家食指八百士農商賈各專一業長幼咸遵禮法毫無閒言自始祖鳳迄今數百載同居蓋十一世云

魯爾良太學生自三世祖濟清至爾良之孫廷魁十世同居門內肅雍庭無間言子弟各受職業不敢私財事無大小皆稟命於爾良

忠節

明

高翔洪武中以明經徵爲監察御史所論奏皆國家機要多被采納建文時尤戮力戎事相與激發忠義初翔與程濟並徵翔

勵名節濟好術數翔止濟勿爲此不聽已而有兵事濟又勸翔學其術翔曰我願爲忠臣也金川門破翔招濟同死濟曰我願爲智士文皇素聞翔名卽位後召之翔持喪服入見大哭語不遜乃命殺之沒產夷族諸給高氏產者皆加稅曰令世世罵翔也親戚悉戍邊又發其先墓雜犬馬骨焚灰揚之而以其地爲漏澤園

程濟以明經爲岳池教諭去家數千里濟夜歸朝邑朝講岳池人咸異之建文初熒惑守心濟上言明年某月某日兵當從西北起帝曰安得此不祥語將誅之濟請囚而觀之明年燕果起兵帝出濟獄中以爲翰林院編修使充軍師護軍小河之戰南軍大捷諸將樹碑露功誇列姓名濟固辭不得夜自襁碑下鐫之及靈壁之戰南軍大敗成祖過軍碑下大怒命鐫滅之遽使

止曰錄其姓名來乃如碑按治濟名獨以先鐫脫及金川門破濟自髡從建文君亡屢免之於阨其後建文君出滇濟嘗從行已莫知其所終

薛孟華北鄉貝家莊人在金川軍營由兵丁拔補甘肅涇州營外委把總乾隆三十九年三月內在當噶拉山梁打仗陣亡奉旨給與全葬致祭恤賞銀兩入祀昭忠祠

義行

明

蘇失名以輸粟賑貧秦王聘其女

丑遵先王文美开輸粟百石表曰尚義給冠帶王輸粟四百石以賑貧王氏科名之盛基於此又正統間應詔輸粟千石建坊勅旌者寇福五百石官爲立石者李珩劉十九輸粟未表者韓

整王孝廉正德中有雷冬者輸粟五百石賑饑有司不爲關白未旌

薛國光善事繼母性好施與歲饑捐米助賑邑令姚士塾累旌其門

蘇濟舟其先大母母相繼設漿給飲濟舟因捐二百金建廟市良田十五畝爲設漿九遠計丁亥戊子歲大凶道殣相望濟舟募人掩之他義舉多類此邑紳袁徵音爲廟記濟舟孫繼祖崇禎十三年大饑餓莩徧野繼祖施麥二十石施蓆一千五百餘領募人掩藏縣令給匾大司馬賈公聞之旌其閭

邑民朱子仁素貧乏拾劉照銀三十金秦進銀二十金俱慨還本主邑令據詳給匾旌之

靳能馬邑教諭後知山陰在馬邑有門役者少俊而貧能憐之

朝邑志卷六

十三

偕諸子同席研時其衣食又攜至縣舍成就之已而舉進士爲陝西叅議時能死延其妻坐拜之後爲中丞意勲勲厚恤不厭安姓朝紳魏國柱家僮也柱被闖賊拘繫拷餉安娃隨之朝夕痛哭柱被傷娃負送水火摩拊痛處時設運盤費不忍離後隨柱死於紅芝驛

李思經王欲純王穩兒因歲饑不受嗟來食經自縊純服毒穩兒入土穴不出又諸生段廷儲性鯁介仇富貴妻死不再娶歲饑子外出絕粒數日度不能活則之野坐待盡其從子請歸養不從餽之亦不食竟死子潔歸痛父以餓死賣挽車償夙負升合畢投於河衆救之周以粟謝不受縊死郝尚信貧無妻以治棉爲生萬歷十六年大饑恥操瓢閉戶忍死三日人或知之持粥入餉堅不食死

本朝

張文英與弟文耀共好施與設義學義塚修橋路捨寒衣及棺  
蓆遇荒捐粟賑助義氣著於鄉里

張翔如字翼雲大慶關人貢生任秦州訓導勤講課士孤寒者  
資之成學苦節未旌者助之以請後告歸年八十卒自祖父來  
每歲冬施皮衣五十領米粥三月濟人翔如繼之加廣子玠玲  
又善體父志玠爲邑廩生母早亡事繼母五得其歡心雍正十  
三年饑承父命捐穀施濟所居大慶關北街約五百家各分給  
數金又辛丑河徙漂蕩古家寨等處復以父命捐數百金照戶  
拯救玲邑諸生嗣胞叔監生翻如叔早逝孝事孀母朱氏矜恤  
外家撫養母之女所遺孤子女爲之婚嫁以曲慰母意康熙六  
十年饑捐麥一百五十石濟鄉里雍正十三年歲歉欲賑苦倉

朝邑志卷六

十四

虛妻朱氏竭囊一百五十兩計鄉大小口分給之乾隆三年河  
溢沒沿河棉地糴麥五十石相均濟又捐六十兩修補大慶關  
支河木橋十餘丈人德之爲立碑精岐黃術施藥餌得異人訣  
咒治跌損如神求治者踵於門祖遺施粥分析後有不能協舉  
者玲獨任之其他捐助一切義舉必與兄玠偕力皆本父翔如  
世德之厚云

安五桂增廣生襁褓喪母九歲父生員濟亡繼母貧氏鞠育之  
及長事母曲盡其孝待人有恩義同鄉程夫貴貸息行賈折本  
不得歸寄書與家人訣生傷之代償所質召令賈者還相聚嘗  
鬻牲趙渡鎮見夫妻抱子而泣者問之乃郟陽人劉全生因寄  
食豪家被逐轉徙旅店將賣子償食債計年老不能再得子故  
慟也生以鬻牲錢如數給之夫婦感泣抱子去又同邑貢生穆

涵康熙六十年歲歉在本鎮散穀三百石又捐米十石助煮官粥子監生君任雍正十年小歉散麥二十石米二十石父子好義舉常貸貧者不能償則焚其券築室於通衢家嗣旁冬施粥夏施茶捐助邑侯修學銀八十兩監生蘇雙浩康熙六十年歲歉散麥穀五十餘石雍正二年代納里中貧民逋糧四十餘兩十一年散麥穀四十餘石里有婚喪不能舉謀生不給者隨爲助濟不責償生員張爾公康熙三十年大荒散米二十石麥二十五石六十年又散米三十石有張姓鬻女蘇姓鬻子於爾公多與之值念其饑也恩養十餘年後父母求歸其子女卽還之不索值每歲杪度里中窘者酌口資給錢米以爲常膺鄉飲僕賓爾公叔張惇康熙六十年饑出粟五十石每歲施茶湯有負債不能還者卽燬質約教孫姪入庠入監者多人得年八十六

貢生蘇官枕雍正元年散麥三十石十三年散麥五十石錢二萬五千文用濟貧困不責償每元旦節俗不交易無以謀食有借貸卽予饋遺貧者或五七斗不等行之久不厭農官衛起隆少孤業賈起家康熙六十年饑捐米四十石助粥賑雍正十年散麥三十石爲族泐祠置祭田約同志買義塚地二畝收瘞河漂暴骨生員闔加祿助修學銀八十兩督工不倦康熙六十年雍正十年俱捐穀濟貧每冬夏煮粥施茶遇困乏者常爲賙給鄉耆張守義康熙六十年出粟百石以濟人年老失明子生員文蔚朝夕侍立積二十餘年寒暑不易成父志焚數百金逋券免積欠佃租貢生蔚作霖康熙六十年出粟數十石助賑有負債焚契不校善岐黃術活人不受酬義民薛玉珩康熙六十年出麥四十餘石濟貧雍正五年捐銀百餘兩代鄰村貧衛完所

欠官糧有傭工年四十無室工價外給銀三十餘兩爲之娶資其生理衆義之舉鄉飲雷京魁常以薪米賙給親族貧乏壬子歲歉施粟數十石王鰲自始祖王鳳至鰲九世同居康熙六十年散麥五十石以上俱邑人秀農雖殊其居家孝友行已端厚大略同也

張鵬大慶關人候選州同知孝事繼母撫弱弟鄂如成名弟早逝遺婦卍氏孀居三十二年敬養有加克全苦節教訓諸孤姪如己子性好義慷慨樂施每遇歲飢輒傾囊賑濟制軍鄂旌其門曰志行修整子玘承志述事冬月河梁施湯康熙六十年歲荒捐助族人賑濟鄉里毫無德色邑令高舉爲鄉飲僎寶至今遠近咸稱張善人云

張珣大慶關人候選州同知孝友性成慷慨好施乾隆六年捐

社穀六十石十四年歲歉捐賑穀一百石方伯定旌其門曰惠洽鄉隣妻楊氏孝事孀姑承顏怡志至老不衰撫兩歲孤姪皆入國學又嘗捐奩資助賑濟人咸稱爲義夫孝婦云

馬瑄疎財好義母有遺婢聘者議作妾瑄力拒還其母俾自擇配并資以奩具其後他婢皆然有負金者物故妻少子幼其兄欲鬻其妻以償瑄立毀其券母子賴以相聚母族貧不能存歲時周急之外復給田以爲恒產一友銷乏將盡去其業瑄慨與百金賴以營運得安然每遇荒歉或給銀或散穀首倡義舉至修堤施藥凡有濟於人者靡不孳孳恐後行之五十餘年如一日

閆文瞰邑諸生好義樂施雍正二年自山西置一婢奉母越五載其父忽以已字人爲辭卽慨然命之歸且贈金助其奩乾隆

十三年大荒心切調之而不欲居其名托人施粥並給皮襖二百餘件一時賴全活者無算乾隆二十四年歲大荒復施粥一季其他矜孤恤寡敬老懷幼蠲租施藥賻喪助婚嫁及伏臘苦難舉火者每周恤而加惠焉臨歿時猶告誡其子孫曰廣積陰德司馬之訓宜三復也

葛譚素重義取與不苟拾金田間攜歸置篋中仍於拾處坐俟少頃失金者倉皇痛哭而至譚詢之得實卽出而還之其人欲分金爲酌却不受

盧士元太學生性好施濟康熙六十年歲飢施麥一百餘石雍正二年八年共施麥一百八十餘石乾隆十三年捐銀一百二十餘兩穀八十餘石 方伯太守屢給匾獎勵又捐設義學延師訓隣里子弟賴以成名者甚衆

朝邑志卷六

十七

盧英例授武信郎以孫貴貤封昭武大夫平生樂善好施累捐銀粟以濟貧乏少孤事兄盡弟道恤死施棺樂誨人門下成名者二十餘人

侶森西辛莊人自奉最薄而與人極厚乾隆三十六年歲飢森出金粟以賑隣里全活不下數百人及歲豐隣有謀償者辭不受有挾森資貿易澄城無錙銖償森諒其貧券悉焚

王兆豐原籍雲南爲陽昌村民王丕章義子丕章出外十餘年不歸兆豐力作以供義母全家衣食艱難萬狀無去志已乃走萬里尋得其父因老病且窘甚不得歸復在彼力作以贍其父噫世之懷利以事人者利則就之無則去之今兆豐之於王氏無所取利而同憂共患始終不渝此真可謂義子矣

劉瀚字海若趙渡鎮人爲人長厚仁慈親舊以緩急告無不應

康熙辛丑歲飢出粟賑濟散銀數百兩義行孚於鄉里其子大受天性孝友善事厥母與本生母順志承顏深得歡心爲人慷慨好施奉行乃父之德每遇荒歉必出錢粟以賑貧乏又常捐修學宮建立義學施義地捐社穀凡負欠力不能償者悉焚其券邑令王屢旌其門安邑宋鴻臚在詩表其墓曰孝義劉公李長興字子盛寺后社人居鄉仁厚和平樂善好施康熙六十年出賑貧粟三百餘石乾隆十三年又饑其子瑄復捐銀二百七十餘兩父子相繼救荒鄉閭感德

趙士式平羅村人慷慨好義乾隆十年捐社穀三百石並建房三楹於本村後將房與穀俱歸貯伯市鎮社倉 賜八品服乾隆十三年歲飢散銀三百餘金麥一百餘石各憲俱給額獎賚凡隣里中喪祭婚嫁有不給者無不出金以助不責償羣推長者焉

雷元儒字雅臣邑諸生性好義戊辰歲饑周恤里人四百餘金庚寅又饑散穀三百七十餘石又施地二畝爲義塚 賜八品服楊衍嗣明府贊曰淳澆遞遷耨耨見色推宅指困豪舉頓息惟公頓然早擅岐嶷手執一經量涵八極沾溉後賢古訓是式錢散千緡金捐百鎰似農終畝如餒甘食澤及枯骸恩宏任卹攬其餘暉藹如冬日

胡麟角乾隆十三年歲飢散給里人穀三百餘石 賜八品服雷曰舒字步元太學生乾隆戊辰歲飢賑給里人銀二百餘金雷大受字君可太學生乾隆庚寅歲荒歉散給里人穀一百餘石製棺以給貧不能殮者

郭克鰲下秦村人太學生慕義敦行有貧瘠者卽貸之金不責

償晚年出借券百餘紙俱焚之曰無以是累貧人也統計免宿負千餘金雍正十三年歲飢出粟百餘石賑隣里任恤之誼衆所共推子兆保孫繪繡相繼各散麥數十石至今樂善好施之風不墜云

雷運高字升宇性雅飭有雋才植品方正里人羣推重之遇有紛爭難決者得其一二語咸輸服又好施與宗族隣友有不能喪葬婚嫁者悉周之宇歿里中罷社及葬童叟執紼哭送數里不絕後以孫大俊職貤贈奉直大夫

雷元利字益公運高 性質儉不喜華侈雖席豐履泰而恂恂如布衣生平急於施與常云有無相通洽比之誼應爾若厚自封殖不過一守錢虜耳乾隆辛卯戊辰歲饑先後輸金粟里中全活甚衆戚黨之有急者每不待其請而助之屢膺鄉飲賓德

朝邑志卷六

十九

隆望俊當道無不引重爭旌其門閭以子大俊職封奉直大夫饒永祥雍正壬子歲大饑出粟助賑里黨藉以無恙邑令於霈旌其閭曰好義足風

饒永成乾隆丁卯歲飢出粟賑濟里中戴德時郡伯喬光烈給匾獎勵

雷起祥字意如泰安堡人鄉耆年九十一歲步履康健每逢道瓦礫必擲去先貿易市廛有隣人竊取櫃金瞥見退避佯爲不知不忍敗其名節每歲歉輒出粟周給隣里不吝所有生平不與人爭是非較短長和氣謙德邑人盛稱之

李顯宗河西村人乾隆十二年捐麥穀七十餘石助儲社倉處鄉黨有無相通毫無德色爲人亦朴實醇茂饒有古風

劉朝笏寺后社人爲人謹愿好施與奉母命捐田十畝助修城

隍廟常建湯房於本社路西施漿水以利行人行之數十載無倦心且因年老無嗣願將所有地三畝六分房六間盡歸諸公并慮族衆日後有覬覦之者呈請勒石以垂永遠

孟一衡性廉介不肯以一毫累人有引之作商者固辭不爲廿拾柴自給其婦亦安之無怨言乾隆十三年歲荒鄉隣贈以錢粟不受投河而死其子痛父之死不數月而亡殆亦至性過人者歟惜未詳其名

雷百行字孝先爲人醇謹動必以禮法博覽羣籍叩無不知載酒問字之車往往盈戶外憫今世罕良鑿尤精研靈素自朝至晷汲汲以濟人爲事未嘗受人餽遺其貧不能藥者則袖金贈之蒙其惠者無筭

張憲成相底村人康熙六十年散麥數十石繼此每年二三月

朝邑志卷六

二十

必借麥於貧民不償者亦不責乾隆十一年其子耆賓翀捐穀三百石於雙泉鎮社倉受八品服乾隆十三年大荒其子猗散麥數十百石乾隆十六年出麥一百六十石俾鄉保儲公所每年斂散不取息是年鄉飲延爲耆賓自二十四年至三十七年散麥六次每次數十石散金三次每次二百餘兩先後縣令咸勒文給額以旌焉

謝開基雙泉鎮人平生好義有澄城少年八市失糧銀數兩哭於市開基見而問其故出金與之且曰勿令汝父知懼撻汝也共季弟關基遊涇干獲亡金數十兩密訪其人付之亡金者謀致謝卻不受客有負金五十兩誤以八十金償旣去始知卽遣人馳還之其見得思義如此

李際豐子延齡孫鎮曾孫邦棟邦特好義樂施世濟其美每遇

歲歉輒散金出粟全活鄉里邑令屢旌其門

白士琳慷慨好施屢焚借券饑年出麥穀散金錢先族党而後鄉隣必盡所有旋燬其籍曰毋留爲後人示德也邑令嘗給額旌之

雙泉鎮謝氏士倬貢生士仰監生大和叔姪三人於乾隆十二年救荒散銀三百餘兩方伯武嘗旌其門

雷元真字名臣庚寅歲饑散給里人穀一百餘石邑沿河灘地衝決村人苦賠糧真首倡籲請得豁免灘地糧十頃餘次子大獻善承父志左右襄贊厥力甚多

雷大烈字武公元儒子貢生有厚德克繼父志父沒後有持百金來償債者大烈搜篋中無其券謝不受邑中飢施粥助米八十石延師塾中訓貧家子弟里隣屢受賑賙有焚香夜祝者曰

朝邑志卷六

二十一

願世世食厚報也士大夫與交咸樂其善氣迎人

雷大柱字南池性淳樸嗜讀書工古文學時推博雅生平施米粥廠修藥濟人力所可爲無不爭先恐後義行不可枚數

雷大猷字君秩施粥恤貧爲人警敏耿直人服其公明

周應壁貢生初有名譽序嘗以優行薦兩女鎮有社學久廢應壁捐資重建延名師訓課里中子弟至今其弟應奎經紀其事弦誦之聲相聞

貢生張翥積而能散里中有婚喪不能舉者必助之於姻黨尤加厚焉居前後數十家周之萬有餘金其子監生好仁克繼厥志荒歲減價糶麥百餘日其孫貢生欽遇人有停喪者卽勸之葬以不辦告則往往濟以已財亦能散粟周鄉人

東野雀耆賓韓執魏事兄如嚴父而從子輩事之亦如其父故

家中百餘口終其身未嘗異爨焉嘗於路拾金求其主不可得則盡以給貧乏遇歉歲屢出資賑貸不求名譽鄉人咸高其義白塚監生唐可才輕財尚義於鎮之東南隅出已地五畝有竒半爲施湯舍基半爲義塚以葬死無所歸者而且嘗施棺木焚宿券出賑粟利濟甚多

節烈

明

翰林程濟妻某氏濟爲岳池教諭以熒惑守心將疏論之氏諫曰天道渺茫未可盡信柰何越職言事濟不聽逮繫廷訊隨至京後金川門破濟從亡氏自縊死

劉烈女龍門村人成化中父母許字楊氏子未嫁而楊氏子病死女聞易服不食涕泣請往臨乃就族兄舉人偉而質焉偉曰

朝邑志卷六

二十二

子志甚善然太過之行如衆笑何家共弗許女悲憤遂自經死李烈女者嚴伯村人錦衣衛總旗李海澂女也父卒與生母焉女覺其污也痛父無後哀母無依憤枉大哭三日飲酖死年十四

張烈女西莊張世強女字市民魏珠萬歷八年珠死女年十六衣縞不食誓以死殉母氏百端誘之曰珠貧兒也旣無緣早世它日擇壻更適富人不猶愈於徒死邪女曰以一女子事兩人乎卒不食家人慮自裁防護甚嚴女乃佯飲食如故居二日給其父母曰我已甘食母以我故誤田作又以履遺殊母棄問自經三日昇至魏門其面如生

党氏羅詢妻嘉靖二十二年大饑窮民劉曹邦等爲盜掠誘詢及富民數人於河濱盡殺之還劫其室詢子亦遇害婦匿積草

中免後事寧諸被殺掠者皆畏不敢言氏獨憤出訴當道初不爲理氏愈益憤恨至以豕穢塗口而肩夫脛骨號泣道旁冤聲動市人官爲捕作亂者二十人置之法

閻氏任世威妻嘉靖中世威病死舅姑利富民張應舉多貲設計譎載送其家氏不勝憤以被蒙面自刎死血滿牀裊富民因勢力人以彌縫氏節遂不章

楊氏王思謙妻夫亡誓不他適舅姑屢欲奪之食以糠粃氏守益堅隆慶己巳舅姑陰納任姓之貲立逼就車氏抱幼子痛哭曰吾舍汝去矣遂自縊死

張氏楊專妻萬歷丁亥歲大禊人相食專與一子先斃氏自投於河傍人出之氏曰我義不爲乞丐故就溺耳從容結衣履投河而死

翟氏翟可速女生員何大慶妻萬歷丁亥歲饑大慶出糶嬰疾還氏屢祈身代知不能輒自紉襟衣誓以同死何垂盡目氏曰去矣氏曰姑待我急入室更衣自經時年十八遠近弔愍奏聞旌表附祀烈女祠

高氏韓登第妻生二子登第病死翁欲嫁之氏號泣願守育二子翁固不從氏曰我義無再醮且寧使兩兒更他人楚辱遂將以赴井先推入長男次抱幼子倒身而下皆死焉聞者無不雪涕

張氏石捷妻捷死氏拜辭舅姑及弟妹閉戶而自縊家人欲毀壁救之氏從內止之曰母壞吾大事遂縊死經日面如生事在天啓六年

吳烈女崇禎七年流寇劫掠欲去女堅不從強牽至坡底嚇以

刃女大罵不絕口遂被害

劉小桂者邑樂戶女也幼有志操誓必爲良家婦每同籍者議聘輒啼泣不食旣長父母強納之歸有日矣小桂知不能已飲毒死

本朝

張氏王文祥妻氏素賢淑里中狂徒窺氏夫他往潛入氏室逼之氏憤激詈罵脅以利刃罵不已斷臂乃絕家人奔救少蘇頃之夫至窮其故靳而不言母至乃泣指強暴狀而卒強暴伏法  
氏膺 旌典

樊氏生員張璠妻年十七夫亡無子父母憐其少欲改適氏微聞此議痛哭不食嘔血而死

薛氏孫崇朴妻夫病革語氏曰我死汝嫁乎氏泣對曰存以代

朝邑志卷六

二十四

君養不得已以死繼之夫死家利富人重幣使強載去時夜已半氏守燈厲罵不絕達旦得脫歸飲藥死

韓姐劉鼎建女許字潼關衛閩氏子子習優一日演雜劇於本村女不知從羣婦女往觀或戲謂女此郎若郎女淡恥之遽歸懟泣不肯食家人勸慰百端終不聽數日以間縊而死年才十三事在康熙五十年六月初旬也

尚氏故民雷養寬妻也寬死矢志守孤寬堂弟雷養香逼娶之氏不從自經死聞於官實養香於法 題旌焉

節孝

元

王氏馬宅妻宅卒氏年十九守節延祐元年 旌表

明

張氏韓顯妻邦奇祖母也年二十七顯死守節五十年有司上其事旌表

師氏張三妻年十九夫亡守節織紡以奉舅姑洪武中旌表  
王享妻靳氏年二十七守節卒年九十一旌表蔚太淑人薛氏夫亡守節洪治中旌表

雷氏大名府同知雷爵之妹適韓繼宗年二十五繼宗卒遭繼姑之虐怒輒以簪刺其股肱流血淋漓又遭惡叔凌害百端晝理生事夜則閉門痛哭徹夜有司上其事勅賜旌表

許氏韓邦仁妻年二十四夫卒無子家用不足辛苦萬狀巡按下所屬辟節婦朝邑以十人應命巡按取年最少而無子者三人許氏其一也

張騰霄妻王氏徐福妻岳氏韓迪妻楊氏王來召妻梁氏皆夫

朝邑志卷六

二十五

亡守節並膺旌典

張信妻史氏韓苑洛徐節婦碑云張信妻史氏之存後功同於博陸

仇氏井繼妻夫早亡遺子柰強甫三歲氏甘貧守志撫教有方強復早逝同子婦丑氏撫育孤孫至於成立時稱兩世同節又李芳春妻馬氏嗣子文郁妻馬氏皆以年十八寡亦守節終身並膺旌錫

孫氏翟可教妻翟死非命氏年二十欲以死殉有姑在乃忍死事姑姑九十終泣曰姑亡吾何待欲自經夢其姑救後卒以人救得不死守節七十餘年又邑庠生王之翰妻井氏年二十而寡姑以繼弗慈或勸之嫁矢以死愈孝謹姑亦化之初民病夢見於神自禱親終養方敢死已而病愈其後親死葬畢未及禫

而亡

李氏謝登輔妻早寡守節上事翁姑下撫幼子女咸有儀則四十年不復爲容子自賢事母至孝

雷氏王學讓繼妻年十五歸讓五年讓死謂氏曰我死汝早自爲計勿徒苦氏飲泣不能語因指天自誓必奉舅姑撫孤子時嘉靖丙寅歲也遂屏容飾勵操以堅其志撫王前妻子皞如如已出皞如旣貴迎養官舍每食異味則謂皞如曰遠不能致爾祖父母柰何其慈孝出於天植如此卒建坊旌表

楊氏申養情妻丑氏霍養孝妻楊年十九守節五年二十六守節皆教子有成又同里馬文彬妻趙氏進士雷子質妻王氏雷子忠妻王氏皆以完節稱

張氏諸生党元第母趙氏樊臣芳妻俱年十七而寡撫子克成

朝邑志卷六

二十六

又張氏李尚平妻年十六而寡开氏生員張俶載妻年二十八而寡二氏皆無子撫姪爲後苦守終身又樊氏監生韓仲詢妻張氏王洪緒妻夫亡時年皆二十有二矢志苦守撫孤成立節操凜然又孫氏邑人徐發母年二十而寡家甚貧以紡績自給苦節四十餘年

雷氏李天壽妻年二十一而寡無子守志鄉里賢之又王氏李騰琨妻夫亡守節按察使給匾旌表王氏御史雷仕禎繼妻年二十四而寡撫幼孤肅家政者四十年節慈並著馮氏何承祿妻年二十而祿亡家貧織紡誓守終身

本朝

李氏韓快妻年二十二而寡事病姑敬謹不衰家素貧拮据茶苦持家有則長子宗琰以行義著於鄉次宗玠有聲鬢序皆母

教成之也年七十八而終雍正九年 旌表

侯氏永年令王報春繼妻報春居官清白其亡也氏撫一鵬翼鵬程紡績佐讀備歷艱苦鵬翼登康熙辛酉賢書己卯鵬程復以第一人舉於鄉人謂廉吏宜有後亦孀母苦節之報也

關氏馬毓宗妻蘇氏張頌音妻夫早亡並寄食於母家甘貧終老關有子廷對生員守節五十五年蘇無子卒年八十七守節七十一年

二張氏一貢生郭藩母一諸生王琛母也二氏並夫死守節事親有禮訓子有成藩母七十六卒琛母年八十一卒

張氏李含萌妻上官氏楊鯁妻上官氏趙攀詔妻上官氏樊玉瑚妻夫亡皆親老子幼仰事俯育辛苦備嘗舍萌妻年六十攀詔妻年九十玉瑚妻年五十八鯁妻年三十八遽終聞者傷之

朝邑志卷六

二十七

以爲未食其報云

朱氏雷福有妻黃氏孫維乾妻謝氏周士熊妻雷氏賀昌祚妻夫早亡上事孀姑下撫孤子備歷艱苦孝慈兩盡後朱年七十六謝年七十九雷年八十黃氏年九十邑令陳昌言表其門曰節壽兼隆

侶氏張辰斗妻趙氏李應春妻夫死無子並撫從子爲後侶守節六十二年趙守節四十餘年

馬氏樊王佐妻徐氏張經濟妻夫死俱無子誓不再醮馬苦節六十六年徐苦節四十二年

于氏王所進妻劉氏樊中鵬妻都氏仇允忠妻王氏張羅俊妻王氏樊良弼妻王氏吏目王三省妻夫死各守遺孤教養備至迄能成立于氏年六十八劉氏年七十都氏年八十七張王氏

年六十七樊王氏年七十六黃王氏年八十三人謂天祐全節故咸登上壽也

王氏生員嚴呈瑞妻貧氏生員安濟繼妻任氏楊東昱妻謝氏楊三尚妻夫死俱誓不再適茹荼教子歷久不懈王氏年六十貧氏年五十五任氏年六十餘其子皆諸生謝氏年八十六其孫有遊庠者

張氏生員何之英妻年二十七夫死截髮納棺矢志撫孤寇至掣其耳取環以去氏卽截耳以示不污子亡又育孫成立年七十七卒

田氏吳興讓妻年十九夫死子加祉甫週氏奉孤撫子黽勉勞苦未幾加祉夭氏孑然孤嫠朝夕不給從子加福迎養之苦節歷四十餘年

朝邑志卷六

二十八

田氏王大猷妻夫死氏年二十有二家貧無子翁姑欲令改適氏以死自誓卒撫嗣子成立姑疾拮据奉養孝敬不衰守節三十餘年

雷氏王慎獵妻年二十二慎獵死無子矢志守節夫弟慎餘年八歲氏善視之以妹妻慎餘生子門臻未幾慎餘又死妹年二十八二寡同撫一孤暨成立娶婦郭氏門臻復夭郭年二十四依二姑爲生節孝並著時謂一門三節雷氏年各八十餘卒郭壽亦至八十

任氏生員馬琨妻李氏其妾也任年二十四歲李年十八歲夫亡任念李年少微探其意乃涕泣曰我亦婦人何賤我乃爾自是二氏同心守節事翁姑以孝聞撫姪爲子教之成立琨弟瑤妻崔氏年二十于歸五月夫亡悲號絕粒翁姑以大義諭之始

強起食繼姪遇麟爲子朝夕以禮自守遇麟娶妻薛氏年十九麟亦故無子崔與薛相持哭幾殞乃以姪孫天保承祧教以讀書後天保娶妻孟氏數年夫婦俱亡祇遺襁褓子二氏含哺撫養紡績度日任守節三十九年見年六十三歲李見年五十六歲崔守節四十一年見年六十一歲薛守節三十一年見年五十歲人稱一門四節

李氏邑故民倪曠繼妻年十七結褵甫五載夫亡矢志守節撫前妻子恪成立曠仲弟倪濟妻常氏年十六夫故無子誓不改適擇夫姪爲嗣季弟倪暢妻劉氏年十八於歸三載夫亡守節生遺腹子慥撫育成成人三寡相依栢舟共美於乾隆八年 旌表

王氏邑故民雷壽萬繼妻年二十四夫亡子代良尚在襁褓氏

朝邑志卷六

二十九

矢志靡他代夫事親撫孤日紡織以供菽水迨子成立婚娶生孫媳張氏年二十一代良亦故姑媳相依守節撫孤芳規並著乾隆十年 旌表

王氏邑故民趙明順妻年十五于歸越五載夫亡子永澤生甫兩月恩勤教育成人娶媳侶氏生孫侶氏年二十一夫永澤亦故姑媳相依共勵節操撫孤以繼宗祧乾隆四十年 旌表

雷氏趙定邦妻年二十六夫亡事翁姑撫幼子紡績易食備極艱辛夫弟新邦爲叔後已析居娶張氏年二十四亦寡遺孤二歲翁姑自傷窮獨每顧孀媳孤孫悲痛不已二氏乃共勵貞節協力事親合居一室三十餘年無間今張氏已亡雷氏見年六十有三

趙氏安養氣妻于歸三月夫以家貧貿易湖廣病故氏年十九

徹膏沐操井臼紡績易粟奉養其舅撫孤子祥成立娶董氏甫  
一年祥赴楚扶襯亦故時董年十九誓不再適倚姑趙氏勤紡  
績午夜猶聞機杼聲趙氏年七十五卒今董氏年已七十  
張氏馬冲妻年二十二夫亡守志撫姪及第爲嗣娶媳劉氏越  
二載及第亦亡劉年纔十九以年少慮不克終謂媳曰汝行自  
便我應俟死媳婦泣跪請曰夫死不嫁古所稱也况以姑之貞  
節媳何忍他適自是姑媳紡績度日慈孝各盡張氏年七十一  
卒劉氏亦苦節三十餘年

惠氏盧聽月妻年二十一夫亡無子上有祖翁並翁姑在堂下  
僅有四歲夫弟盧冲漢零丁孤苦矢志守節孝事兩代夫親克  
盡婦道及歿喪葬盡禮撫育夫弟成立授室生三男冲漢夫婦  
又相繼去世氏教養三姪成立年七十四卒於乾隆十年 旌

表

師氏倪慥妻張氏倪恂妻俱青年夫喪矢志堅貞孝養孀姑恩  
勤鬻子妯娌同居冰霜共凜乾隆三十三年 旌表

王氏生員麻出羣妻夫亡時子淳然甫六歲氏守節撫孤歷三  
十餘年淳然娶婦井氏生子直甫四歲淳然早卒井事姑教子  
更歷兵荒年七十三卒時稱一門雙節直妻王氏亦守節苦志  
終身

韓可願妻井氏子知來妻李氏孫日孜妻閻氏三世皆寡閻生  
子崇雅七月夫亡祖姑與姑衰白在堂孝於二老撫成一孤時  
稱一門二節有司交 旌之

武氏年十七歸薛景安越歲夫死欲以身殉時遺腹九月祖舅  
姑舅姑皆老氏遂堅貞自守勤紡績養生送死教子宗泗讀書

例貢國學苦節三十五年今五十二歲乾隆二年 旌表

諸生陳王道妻張氏年十七歸陳陳死念姑老且患痿痺竭力奉養扶掖十餘年無懈志姑歿自以無子女孤節何補日夜歛歔欲自殺從弟廷懼遂以子玉堂從襁褓中與之氏撫之成立補邑學弟子員氏今六十有四苦節四十一年乾隆元年 旌表

祁氏貢生張翱如妻夫死教前妻子璪爲邑諸生苦節三十二年朱氏翱弟太學生翻如妻夫死氏年十八無子兄翔如以子玲嗣之氏撫如己子爲諸生苦節四十一年秦氏翱姪琬妻夫死氏年十六撫姪諸生爾謙爲子苦節三十三年人稱一門三節

程復宗妻雷氏年二十四夫亡孝事舅姑勤理家政守節四十

朝邑志卷六

三十一

七年并見龍妻董氏于歸未四載夫亡志不可奪訓子若孫成立守節四十六年劉敬承妻王氏年甫及笄失所天苦節三十四年前後歷事三姑終始如一李世泰繼妻羅氏年二十一夫亡撫前子如己出守節四十年劉壑妻雷氏年十八而夫見背取姪爲嗣以守其姑善病氏常默禱以身代姑亦心愛之苦節三十五年俱乾隆五年 旌表

諸生趙際可妻趙氏年二十五守節事兩世翁姑以孝聞撫遺腹子迄於成立見年八十一歲諸生王純妻常氏年二十二守節取姪爲嗣克成夫志見年七十歲俱乾隆五年 旌表

張學珍妻趙氏年二十二夫亡在外家貧姑老氏生養死葬撫其週歲子成立遣搬夫骸歸葬焉閭有容妻馬氏年二十四守節兩世翁姑色養無間訓子若孫有法度蘇崇智妻雪氏年二

十二勵節撫孤師爾操妻霍氏年十九操亡力貧誓守二姪亦幼孤師鞠育之迄長以仲還伯氏季爲夫後張予翹妻李氏張文正妻馬氏李年十六于歸甫半載遽殞所天事翁姑克以孝聞撫幼姪爲其嗣子馬于歸年十七甫一載卽作未亡人時堂上兩親年皆遲暮且俱失明家無次丁氏獨力養送訓嗣孫以義方勁節貞操咸登上壽俱乾隆五年 旌表

劉敬業妻雷氏程復宗妻馬氏張文正妻霍氏生員孟際可妻雷氏劉璧妻李氏俱早年守節於乾隆五年 旌表

張氏劉永敦妻孟氏王尚忠妻溫氏庠生孟彥珍妻俱青年失偶守志代夫事親撫孤成立克紹家聲乾隆六年 旌表

田氏王維德妻年二十五夫亡姑老子幼氏矢志守節奉姑以孝姑沒貧不能葬躬自負土成墳撫子成立授室生孫先後入

泮乾隆七年 旌表

程氏陳文玳妻朱氏劉樊妻俱青年守節力勤女工事親撫孤倍嘗艱苦親歿喪葬盡禮子復生孫以綿宗祀乾隆七年 旌表

王氏劉爾室妻年二十四夫亡遺子襁褓家極貧紡績撫孤成立有隣婦張氏病亡無子氏爲營葬賢節可風乾隆七年 旌表

开氏張鵬程妻年二十一夫亡生遺腹子氏矢志守節家赤貧夫門無依歷盡艱苦康熙三十年大荒攜子隨母家弟就食河南三年始歸教子成立孫入泮乾隆七年 旌表

劉氏柴欽選繼妻年二十二夫亡上有舅姑下有子女家極貧氏誓死不嫁堅志守節事舅姑生養死葬克盡婦道撫孤成立

乾隆八年 旌表

雷氏張翼鳳繼妻年十六于歸十九歲夫亡舅姑衰老夫前妻  
生二子俱幼己生一子未彌月氏矢志守節孝事雙親無缺甘  
旨撫育三子如一嗣夫弟翼鸞物故無子將其子爲嗣子孫五  
世同居乾隆八年 旌表

劉氏衛邦棟繼妻年二十二夫亡翁姑在堂已無所出前妻所  
生子甫六歲家貧矢志守節紡織事親撫孤并撫夫弟成立乾  
隆十年 旌表

賀氏劉永祚妻李氏馬秉職妻張氏衛起麟妻石氏李宗唐妻  
荆氏高秉慧妻楊氏張進瑞妻高氏李灼然妻劉氏王輅妻俱  
青年守節代夫事親撫孤成立乾隆十年 旌表

董氏劉振妻樊氏雷篤生妻俱于歸未久夫故青年守節家極  
貧無翁姑伯叔可依力勤女工撫孤成立均於乾隆十年 旌  
表

朝邑志卷六

三十三

王氏嚴預繼妻年十八夫亡夫前妻子甫三歲氏堅貞自守事  
孀姑盡孝撫前子如己出得以成立乾隆十年 旌表

薛氏石之傑妻年二十一夫亡家極貧上無舅姑又無兄弟子  
女氏欲身殉爲親隣勸止擇夫姪爲嗣守節終身撫孤成立乾  
隆十年 旌表

關氏張矩妻年二十九夫亡家貧守節上事舅姑下撫孤子成  
立織紡經營備嘗艱苦乾隆十二年 旌表

張氏吳經倉妻年十八夫亡翁姑衰老家貧如洗氏堅貞守志  
日勤紡織事舅姑喪葬盡禮擇夫姪爲嗣撫養成立乾隆十三  
年 旌表

韓氏李明信妻張氏党繼烈妻俱青年夫故家貧苦節奉養翁姑盡孝撫子成立教以義方均於乾隆十三年 旌表

段氏張全妻年十七夫亡無子氏矢志守節孝養舅姑克盡婦道以夫姪爲嗣撫養成立授室生孫乾隆十四年 旌表

吳氏趙思普妻年二十二夫故孝事翁姑生養死葬撫三歲孤子成立乾隆十四年 旌表

李氏王爾玠妻年十八夫亡無子家極貧念翁姑衰老不能身殉代夫事親養生送死克盡婦道以夫堂姪爲嗣恩養如己出及成立爲之娶妻以續宗祧乾隆十四年 旌表

王氏朱朋漢妻年二十三夫亡家貧無子矢志守節日夜紡織以供舅姑甘旨及歿喪葬盡禮擇姪爲嗣撫育成立授室生孫乾隆十六年 旌表

朝邑志卷六

三十四

景氏田文英妻年二十四夫亡家貧無子有姑在堂氏立志守節克盡孝養擇夫姪田福洪爲嗣撫育成立乾隆十七年 旌表

雷氏韓瑤妻年十七夫亡無子家極貧有姑在堂氏守節奉養姑病親侍湯藥及歿喪葬盡禮立夫姪韓君勳爲嗣撫育成立無異親生乾隆二十年 旌表

段氏雷乃亨妻年十九夫亡子在襁褓上有舅姑氏守節代夫奉養撫子雷曰舒成立爲之娶妻生子宗祀有賴乾隆二十年 旌表

路氏李應勉妻年二十二夫亡舅姑衰老稚子無依氏立志守節力紡績以供甘旨及歿喪葬盡禮撫子仲成立娶妻翟生孫僅數月子又夭亡與媳二寡相依撫孤孫景敦成立乾隆二十

一年 旌表

翟氏李仲妻年二十一夫亡子生未週同孀姑撫育成立宗祀  
賴以不墜乾隆二十一年 旌表

符氏嚴一旺妻年二十夫亡翁姑早逝有祖姑在堂遺孤甫六  
月氏矢志守節孝事祖姑生養死葬教子成立乾隆二十三年  
旌表

權氏祝聚瑞妻年二十一夫亡生子僅數月翁姑年老家貧無  
依氏堅貞立志力勤紡績孝事翁姑生養死葬歷盡艱辛撫子  
成立娶妻生孫大有名列膠庠乾隆二十四年 旌表

雷氏張毓珣妻年二十二夫亡親老子幼氏勵志守節紡績奉  
親迨歿喪葬盡禮撫子大錦成立婚娶生孫我弓亦列鬻宮乾  
隆二十六年 旌表

朝邑志卷六

三十五

郭氏趙溫妻年十九夫亡生遺腹子念舅姑年老矢志守節竭  
奉養及歿祭葬以禮撫子連城成立娶妻生孫乾隆二十七  
年 旌表

郭氏雷守珍妻年二十六夫亡有遺腹未生舅姑衰老氏矢志  
守節克盡孝養迨後生子文英教育成立乾隆三十年 旌表

王氏安五辰妻年二十二夫亡子丕承甫生三月家貧無依有  
族婦誘以再醮氏剪髮毀容堅誓守節撫子成立至老完貞乾  
隆三十一年 旌表

張氏董志成妻楊氏白克益繼妻俱青年夫故守節撫孤成立  
均於乾隆三十三年 旌表

閆氏東其成妻張氏李學詩妻俱青年夫故守節代夫事親撫  
孤成立備嘗艱苦乾隆三十四年 旌表

郝氏張之醋妻年二十二夫故守節代夫事親撫孤成立克盡婦道乾隆三十五年 旌表

徐氏楊廷棟妻青年夫故守節代夫事親撫孤成立乾隆三十六年 旌表

何氏張好直妻王氏趙炳妻雷氏葛圻妻韓氏陳大經妻趙氏葛瑗妻俱夫亡青年苦節代夫事親克盡孝道撫孤成立乾隆三十九年 旌表

段氏蕭舒恒妻年二十四夫亡無子家貧苦志守節繼姪蕭蘭生爲子撫養成立乾隆四十年 旌表

趙氏高鴻祿妻年十七歸祿甫半載而寡誓不他適事翁姑以孝稱撫姪國柱入武庠乾隆二十一年 旌表

寇氏党克寬妻年二十一夫亡誓不再嫁敬事翁姑年六十有

朝邑志卷六

三十六

一乾隆三十三年 旌表

党氏王宗第妻年二十夫亡撫孤事親織紡自力翁姑憐其幼且貧恐不能終氏遂自矢其志甘心窮餓翁姑乃安孝慈兼盡三十餘年如一乾隆三十七年 旌表

趙氏閆容妻年二十四夫亡無後舅姑衰老撫夫堂兄子裕策爲後上事雙親養生送死下撫孤子成立爲諸生年七十二卒乾隆四十年 旌表

田氏王九思妻年二十三夫亡孝親撫孤紡績以供衣食數十年足不出戶苦節著聞乾隆三十六年 旌表

李氏魯運文妻年二十三夫亡事舅姑以孝教子成立年八十六卒乾隆十九年 旌表

張氏李維業妻年二十夫亡撫棺大慟欲身殉旣念翁衰老失

明姑亦年邁侍奉無人隱忍存活誓死守貞撫夫堂兄子爲嗣  
仰事俯畜以慰親心茹苦四十餘年現年六十三歲乾隆四十  
二年 旌表

雷氏何光武妻年十九而孀矢志堅貞敬事舅姑喪葬盡禮撫  
嗣子無異己出教以義方苦節四十年卒年五十有九乾隆二  
十年 旌表

王氏劉成文妻年二十六夫亡家極貧氏矢志靡他孝事舅姑  
克盡婦道撫孤成立艱苦備嘗守節三十七年卒年七十有三  
乾隆三十二年 旌表

王氏上榮宗妻年十七夫亡撫棺哀慟誓不欲生繼念祖父母  
在堂兼以懷孕未生冀留一綫立志守節以代夫職後撫遺腹  
子必謙成立苦節五十三年乾隆三十六年 旌表

朝邑志卷六

三十七

王氏雷學誨妻年二十夫亡親老無嗣加以河侵地沒家赤貧  
氏矢志茹荼以紡績爲生持身端慎不事容飾足未嘗輕出戶  
上事病翁久而不衰姑臥疾躬滌穢器無難色撫三齡姪授室  
生子後又早亡復撫孤孫睿成立乾隆三十一年 旌表

李氏馳贈通議大夫劉潔妻年二十撫愛胞姪大猷遂 嗣  
後連生二子大年大受夫亡孀居守節教子大猷成諸生善書  
法大受繼嗣叔父捐道職馳封氏爲淑人家政嚴肅兄弟友愛  
寡居五十餘年節慈並著乾隆二十一年 旌表

党氏劉道敏妻年二十四夫亡撫棺大慟欲以身殉念孀姑弱  
息無依矢志守節以孝事親訓子成立克繼宗祧乾隆十九年  
旌表

薛氏盧程霄妻年二十四夫亡無子氏矢志冰霜孝事舅姑繼

姪榮宗爲嗣教養成立乾隆二十一年 旌表

田氏閨庶成妻年十九夫亡子方週歲痛不欲生繼以祖舅祖  
姑衰邁立志奉養以代子職撫訓孤雛以延宗祀辛劬備至慈  
孝兼全乾隆四十二年 旌表

甘氏劉衍妻李氏馬秉職妻俱早歲夫亡撫子成立

嚴氏雷璘妻王氏上官禮賢妻俱早年夫逝撫姪爲子孝養孀  
姑

何氏白登須妻年二十四夫亡姑年七旬子甫三歲氏不憚辛  
劬力持門戶奉姑撫子紡織拮据

白氏嚴宏杳妻年二十三夫亡翁已衰老子僅襁褓氏誓天完  
貞日事紡績口不言勞翁歿子殞撫姪爲子教訓一如所生

路氏蔚聯魁妻年二十六夫亡于外事姑盡孝歷十餘年以織

朝邑志卷六

三十八

衽所餘倩人扶夫襯歸撫子成立

樊氏李蓮妻年二十三夫亡立志守節事翁曲盡婦道翁弟夫  
婦俱患疾事之數十年維謹

關氏馬毓琮妻年二十三歲夫亡守節撫孤教誨成名學政逢

額 旌其閭

任氏穆重祿妻年二十二夫亡子凌岡方一歲氏苦志守節訓  
子有方凌岡爲邑諸生

徐氏王拱日妻年二十夫亡翁姑相繼逝氏矢志守節撫遺腹  
子至十餘歲隣里憐其貧或勸爲人傭或欲助以生理氏以先  
世皆讀書雖貧不可絕悉謝之令專意就學後爲邑諸生

嚴氏楊文炳妻年十五歸楊甫七月夫亡上事翁姑前室子方  
三歲視若己出教養備極恩勤康熙三十年四月隕霜害禾稼

民大饑暴客劫其糗糧殆盡翁姑欲就食他方移粟以膳氏氏以翁姑衰老請同行中途翁姑皆疲病賴氏扶負始得達

雷氏趙景希妻年二十五夫疾革顧謂氏必報父母之恩夫亡翁姑惜其少寡慰之曰我子死無依汝子立更復何恃氏曰天佑翁姑在堂卽其所恃婦當代子忍有他志耶由是紡績供職孝思益篤迨翁姑彌留慮送終不克如禮時夫弟出嗣族叔已有子氏告族長請夫弟歸宗翁姑殆盡出平日織紡所積與夫弟營葬事無負所天之囑夫弟感其德敬之終身不衰擇從弟子光容爲氏後

任氏王忠思妻其姊先適忠思生子四女二而姊亡時思已年五十餘氏年方十七歸忠思十餘年夫亡爲其訓子女營婚嫁井井有法邑令馮旌其閭

朝邑志卷六

三十九

趙氏薛坤妻年二十二夫亡矢志守貞敬事舅姑撫姪爲嗣內慈外嚴有古賢母風邑令姚旌其門

嚴氏張必振妻于歸時夫已失明酷貧難堪氏相莊不懈紡織以佐養親夫亡僅破屋數椽甘心守節撫姪爲子卒之日鄉里感其貞孝各捐資立石墓前以誌其賢

張氏雷廷柏妻年十七夫亡少知大節誓以身殉阻于舅姑之命不得死乃撫夫弟子爲後以孝事堂上爲已任後其子復歿寡媳孤孫煢煢一室氏艱苦備嘗教養成立邑令沈旌其門  
翟氏李有忠妻年二十三夫亡上事翁姑下撫孤雛苦節終身鄉人以孝慈並稱

張氏党學德妻年二十二歲守寡子甫四歲氏矢志撫孤備歷艱苦

劉氏趙光起妻年十七適起事兩世舅姑俱以孝稱夫亡撫孤節操凜然夫叔已析居常患目疾氏事之無異于舅

韓氏張捷妻生于前明崇禎三年至 國朝順治十年夫亡遺孤二歲姑五旬時寇盜多警氏鍵戶紡織事姑姑病藥必親嘗于中夜爇香禮禱五祀之神適有匿盜竊聽者遂相戒勿犯張孝婦之廬苦節終身訓子成立康熙四十九年卒

蘭氏任善財妻夫亡年二十遺孤二齡無親族可依氏不憚貧窮立志守節撫孤成立

史氏馬文通妻年十九歲夫亡欲自殉念遺孤爲氏似續所關苦節撫子學使楊 旌其閭

張氏王景香妻年二十寡家貧無子氏苦節奉養舅姑俱臻上壽氏卒年七十五

朝邑志卷六

四十

劉氏雷君武妻年二十七夫亡子幼家貧績紡不易其志

劉氏雷暘妻年 十二而孀撫子成名邑令高 旌其閭

李氏雷君召妻年十三歸于雷夫尋亡家貧守志撫姪爲嗣苦節四十二載

馬氏段爲文妻年十九孀苦節五十六年

孫氏馬奇妻年十九歲夫亡孝養翁姑教育嗣孫苦節五十八年督學楊 旌其閭

張氏高自寧妻年二十四歲夫亡勵志守節孝養翁姑孀居五十八年

劉氏張諗妻年二十一歲夫亡無子守節奉翁姑極盡孝養孀居四十二載邑令張特表其門伯兄諸生譽高氏之義以己子猷爲之子

張氏史麟經妻年二十二歲夫亡堅心守節孝養舅姑孀居四十三載學政楊旌其閭

李氏楊元棟妻年二十五歲夫亡守志恪修婦道敬事翁姑學政楊顏其門以獎之

任氏高自峰妻年二十七歲寡家貧紡績自給教子成立苦節四十九年

周氏田玉經妻年二十六歲夫亡姑老子幼仰事俯畜歷盡艱劬苦節四十六年

何氏田忠芳妻年二十七歲寡依奉孀姑克盡誠孝撫育幼子備歷艱難苦節四十二年

張氏李中昭妻年二十夫亡孝事其翁于繼姑尤極誠謹撫姪爲子

朝邑志卷六

四十一

閔氏柴穀妻年十七適穀閱二載穀亡氏養父欲氏改適致訟于公庭氏剪髮明志卒不可奪孝奉舅姑撫姪爲嗣後其子遠出不歸紡績以撫藐孤至于成立

周氏張正誼妻生于前明崇禎十一年至國朝順治十二年夫亡無嗣家酷貧翁姑衰老氏欲擇族姪爲嗣時值饑饉衆多逃亡恐仰事俯畜不能兼盡遂獨力事親艱苦備歷迨翁姑病革乃以夫堂姪爲後撫養成立鄉里欲以其節孝上報氏堅辭而止

張氏劉廕妻年十七嫁十餘日而夫亡茹苦事姑孀居五十四年

馬氏劉岐妻年十八夫亡紡績自給孀居五十年

郭氏薛藹如妻年十八夫亡撫姪世德爲嗣苦志自持

惠氏王宏祚妻年十八夫亡紡績作苦仰事俯畜孝慈兼盡

李氏史際世妻年二十一夫亡食貧撫孤孀居四十六年

張氏王養珍妻拜氏王錫九妻趙氏王汝揖妻俱青年守志白首不渝乾隆十四年學政 旌其門

劉氏李樹實妻年二十五夫卒于外訃聞痛欲絕既乃自矢靡他孝事其姑撫前室子成立乾隆三十九年督學楊 旌其門

申氏董偉之妻年二十二夫亡氏繼嗣守節撫子成人乾隆三十九年督學楊 旌其門

馮氏謝晉梁妻年二十四寡翁姑年老氏誓節奉養教子成立七十三歲卒同州太守李表其門

席氏謝楊妻年二十五寡守節不渝督學楊表其閭

謝氏徐方茂妻年十八夫亡守節孝事舅姑撫姪爲嗣甘貧茹

朝邑志卷六 四十二

苦督學楊給額表之

常氏張宋廷妻年十九寡家貧無子撫堂姪灝爲嗣茹苦終身教子成立督學楊 旌其門

陳氏閆素淳妻年二十五夫亡姑老子幼氏誓節奉親無何子復死氏與媳魏氏同甘苦育孫成立爲邑諸生

李氏劉朝宰妻年二十三寡家貧姑老二子俱在襁褓氏苦節自矢仰事俯畜皆出績紡

李氏劉朝惠妻年二十寡姑蘇氏年老無依氏以奉養自任矢志守節姑歿益勵堅貞撫堂姪玠爲嗣教養成立

上官氏李景智妻年二十二夫亡以翁姑年老矢志奉養或有勸其他適者氏泣不輟自是翁姑哀其志節善待之爲立嗣以

慰其心

韓氏王臻妻年二十一寡矢志守貞克盡孝道翁姑爲之擇嗣撫養成立

葛氏韓述古妻年二十二夫亡誓不改適苦節事親撫姪爲嗣不異所生教養成立

閔氏薛宏基妻守節訓子乾隆十九年邑令高旌其門

徐氏陳王章妻年二十六夫亡無子守節自誓撫伯兄子爲嗣成立

扈氏馬福成妻年十八適馬兄福宇子鵬舉三月失母氏代哺養晝夜不能安越三年夫亡宇卽以此子嗣弟氏貞靜自矢謹事兄嫂無異舅姑教子成立

張氏馬成駁妻年二十夫亡善事翁姑繼姪爲嗣教養成立

趙氏溫和妻年二十二夫亡翁姑年近七旬子甫三歲家貧紡

朝邑志卷六 四十三

織孝雙親育孤子

王氏李珂妻年二十四夫亡繼堂姪爲子貞潔自守孝事翁姑教子成立

劉氏張和妻年十九適和明年夫亡遺子事翁九年事姑二十九年克盡婦道教子成立

張氏黃宗冕妻年二十七夫亡立志守節育姪爲嗣

党氏侯光魁妻年二十四夫亡二子俱幼事姑得歡心教子成立

王氏劉廷弼妻年二十七歲夫亡矢志堅守敬事表姑教二子成立

朱氏國學生張爾佶妻年十九夫亡孝事孀姑繼姪爲嗣恩勤教育入國學守節二十一年卒

李氏馬不祥妻翟氏侶伯聽妻趙氏韓之炎妻章氏張武妻吳氏周肇稷妻張氏高登妻朱氏翟端繼妻皆青年守志至老不衰

周氏蘭不勲妻年二十五歲夫亡自誓無他撫姪爲嗣有家法不事姑息子孫皆登武科

韓氏胡漢妻蔚氏賈之欽妻蘭氏王懷信妻皆早寡守志撫遺腹子成立

秦氏周廷碩妻年十九舉子三月而寡家人憐其少也微探之氏泣曰如此一塊肉何卒撫孤成立

李氏周廷助妻蔚氏王廷相妻周氏宋壽宗妻翟氏秦之義妻賀氏宋文魁妻宋氏雷明居妻雷氏侶金妻孟氏王復顏妻皆少年守節終身如一訓子成人

朝邑志卷六

四十四

何氏高景才妻梁氏趙天運妻翟氏朱瀚妻雷氏靳眞榮妻楊氏梁從彥妻朱氏趙天錫妻席氏武生蘭廷舉妻常氏嚴廷效妻梁氏党德潤妻雷氏張樊妻陳氏梁車妻蔚氏王世德妻雷氏高三綱妻嚴氏朱雲祥妻呂氏雷奉聲妻翟氏高秉道妻張氏郝世德妻李氏翟子楹妻王氏劉詔妻程氏張龍吉妻俱現在守節

張氏井纘業妻井氏李作梁妻王氏張增福妻馬氏張席瓚妻楊氏張有綵妻雷氏郭有惠妻侶氏雷之進妻朱氏雷守純妻李氏雷守煥妻皆青年守志經督學楊給額表揚

紀氏朱霖妻蔚氏張鵬江妻馬氏王懷林妻郭氏張俊妻薛氏舉人張乃來妻張氏閭不恒妻馬氏閭庶寧妻俱青年守志經督學稽給額表揚

成氏李景賢妻年二十四夫亡欲身殉以翁老子幼矢志靡他家貧紡織養翁撫孤督學稽 旌其閭

趙氏仇可法妻童時卽能通內則大義及長女紅中饋無不精善歸仇奉君姑一以誠孝卽尋常饗殮亦必精潔適口姑喜得佳婦年僅二十三夫亡氏不以貧窶易心躬勤織紡撫二子成立

張氏劉銳芳妻年二十夫亡以伯兄次子嗣撫育成立現今七十一歲

郝氏李建言妻年二十一歲夫亡舅姑年老遺孤僅四歲氏奉事二親養生送死克盡婦道撫子成立娶媳媳早亡家貧不能續娶取族孫爲嗣

李氏薛起達妻党氏張宏祿妻俱守節撫遺腹子

朝邑志卷六

四十五

穆氏張興讓妻席氏符捷妻現皆守志撫孤

韓氏楊之起妻年十九夫亡父母憐其少勸之嫁不從撫夫從兄次子爲嗣中道而歿又育夫弟幼子爲嗣苦節三十餘年  
李氏白太慧妻王氏李永春妻俱家貧奉姑繼姪撫養孝慈兼盡

趙氏田學春妻年二十二夫亡閱三月得遺腹子奉舅守節甘貧訓子現年七十七歲

同氏郭基妻年二十二夫亡姑老子幼氏矢志守節紡績以供衣食姑歿殮殮皆出十指所儲教子建綸成立

郝氏馬順妻年二十五寡善事祖姑及翁姑撫猶子爲後

董氏趙永潤繼妻年二十二夫亡守節夫叔母楊老而失明敬事不衰撫前室子成立

李氏甯君爵繼妻年十七寡父憐其少欲嫁之不從誓以死初君爵前室二子郁濟甫四歲德濟以母死養爲王姓子數載矣氏念一子猶孤乃自詣王姓哀請德濟歸宗後郁濟夫婦暴亡德濟舉二子又不祿氏撫長孫授之室未幾又俱死氏一世劬勞貞操凜凜

邢氏王儒珍繼妻年十六歸珍時舅姑垂老前室子方雛越四年夫死邢以奉親撫孤爲任後翁姑及子相繼殂謝邢撫孤孫授室復天迄今姑婦三世皆以苦節著聞

雷氏李長生妻年十九夫亡翁姑皆衰邁氏矢志守節奉養擇族子英爲嗣親歿哀禮兼盡英復中道死遺室王氏年僅二十一生子甫數月二寡相依同撫藐孤雷氏五十六歲卒王氏現年六十五歲

劉氏葛爾濟妻年二十一寡遺孤尚在襁褓守節教子成立同氏席志義妻年二十三夫亡事姑維謹撫姪爲後苦節三十餘年

席氏葛守堦妻年二十一寡舅姑疾廢氏守志奉養撫育遺雛慈孝俱盡

王氏孫才順妻年十九日媼四年而寡上有祖姑及姑小郎才通甫十歲才茂甫三歲氏矢志靡他計事姑十七年事祖姑二十年爲通茂輩授室乃撫通次子爲嗣節儉勤勞老而不倦通茂等事之如母焉學使楊特表其閭

王氏孫文魁妻年二十夫亡時夫從弟舉子未彌月氏卽撫之誓無他志上事舅姑婦代子職督學楊表其閭

李氏王儒彥妻年二十四歲寡初彥有異母弟妹將出外囑曰

弟妹幼失恃吾去責在汝矣李謹受命俄而彥喪至李哭之幾絕旣乃撫棺慰曰吾不以君死忘前言也撫弟妹等婚嫁中禮家彌貧守彌堅五十年如一云

王氏趙希抃妻年二十五抃死有弟不慧子幼翁姑無依氏之死靡他生養死葬皆力任焉初抃嗣其伯父氏至是繼事之如翁姑禮未兒子又亡家貧績紡無怨言

張氏楊宏德妻年二十二夫亡撫姪爲子孝事舅姑自食糟糠朝夕甘旨無缺教子成立守節五十二年

李氏郝景英妻年二十一夫亡無子姑年七旬代夫奉養育姪爲嗣苦志四十五年

馬氏姚成積妻年十四適姚十九生子長才越明年翁亡夫故姑惟日夜泣氏慰曰姑無子幸有媳兒無夫幸有子誓不他適

朝邑志卷六

四十七

以供子職由是茹苦含冰教子成就孀居已三十八年

申氏楊永彥妻張氏李明林妻皆早寡無子育姪爲嗣教養有方

羊氏楊世昌妻年二十五夫亡遺二子越數年俱亡兄嫂欲奪其志氏不從撫姪之子爲嗣孫苦節已四十五年

劉氏徐瑞妻年十九夫亡守節事繼姑二十八年育姪爲嗣教養不憚勤勞苦節四十一年

王氏徐瑗妻年二十夫亡事翁三年事姑十五年育姪爲嗣紡織勤勞爲子婚配苦節三十九年

張氏增廣生周文明妻年十六夫疾篤問其所志氏對曰倘天不佑惟一死夫不許告以代夫事親爲節孝之大氏泣領之夫亡誓志守貞翁姑前就養無違人稱其孝翁歿晝夜侍姑不離

現年五十有五

楊氏盧義雨妻年十七夫亡子未週翁姑相繼逝其兄嫂欲迫之嫁將母子分居以難之由是衣食不給苦辛萬端親族憐之皆勸其嫁氏曰吾子能成固不肯改節卽子不成亦不忍他適四十年冰心筠節卓然不移今一子二孫事氏孝謹鄉人謂苦節之報也

李氏于鳳階妻年二十二夫亡上事翁姑下撫幼子翁姑歿貧愈甚惟以紡績自力旣爲子成室數年子又亡夫弟欲氏改嫁氏貞節肅然窮且益堅撫孤孫成立現年六十有七

劉氏陳秉睿妻年二十夫亡寄養族祖家撫族姪爲子孝事族祖父母勤苦績紡合葬夫之兩世親喪孀居五十八年

蔚氏王良貴妻年二十五夫亡姑年七十有餘家無寸產賴氏

朝邑志卷六

四十八

紡績供養極盡孝道

高氏李延康妻年十九夫亡翁病二十一年氏事之甚謹撫姪爲後現年五十五歲

師氏馬麟祥妻年二十四歲夫亡守節孝養舅姑

雷氏詔安縣知縣蘇石麟繼妻二十七歲寡孀居三十三年現年六十歲氏歸宦門性不喜華飾嗣際家道中落甘心淡薄甚至僻處矮屋紡績度口終無愠容

白氏張鈺妻年二十夫亡侍孀姑盡孝苦志三十五年鄉里咸稱一門雙節無愧厥姑云

趙氏張毓衆妻年十六歸于張數月夫亡念翁姑煢獨誓志守貞四十餘年不復爲容鄉人亦莫之識其翁姑與人言及氏之勤勞聞者無不感慕撫夫弟子爲後

趙氏馬任玉妻年二十五夫亡遺腹子一家貧織紡易粟以養舅姑自茹荼苦鄉隣閔其窮有饋以食者堅不受數十年勤勞所積家產漸裕子孫亦皆成立現年六十又八

張氏趙君命妻年二十四夫亡翁以窮獨無依恐爲氏累欲自盡氏乃誓志守貞願代夫職紡績易粟糟糠自給而精鑿奉翁族人感其孝擇諸子弟中能分任氏之勞者爲後

張氏增廣生周東海妻年二十三夫亡矢志守節孝養翁姑撫姪爲嗣旣娶復無所出而天翁姑痛哭曰天喪我家若何枉自苦耶氏驚曰孫婦新寡觀其志亦可自立不宜以薄情疎之若能事親終身代夫致孝則雖苦不枉矣由是姑婦相依撫堂孫爲嗣

何氏張巽言妻年二十四夫亡翁姑以五子俱喪不勝隱痛成

朝邑志卷六

四十九

心疾氏左右不離紡績奉養每夜再三視安數十年不衰翁姑歿喪盡禮一如子存撫堂姪爲後事氏亦以孝稱皆謂食報不爽云

賈氏党有棊妻年十八歸于党二十二夫亡無所出撫姪孫爲後紡績課讀辛苦備嘗

惠氏周文顯妻年二十二夫亡紡績供舅姑食極盡艱辛無愠色翁姑歿喪盡禮翁遺少子方十餘歲兄妯亡遺一女方四歲氏躬親撫養飲食教誨咸有儀法倍于翁姑兄妯在時

王氏周萬億妻年二十夫亡家酷貧紡織爲活已嘗忍飢舅姑之養不少缺及翁姑亡有析居叔孀欲迫之嫁氏曰不幸翁姑俱亡媳在則神魂有依寧死不從命迨叔孀亡有女二子一俱幼氏痛其幼孤躬親撫養氏之兄弟皆曰汝一身恐不自給柰

何養析居子女耶氏泣曰我不忍絕一門今忍絕兩門乎不辭勞苦撫育成立爲夫堂弟擇配旣而生子二氏喜曰今日周氏俱有後矣無何夫堂弟早逝其婦以氏無所出屢迫其嫁鄉黨皆爲不平欲訟之官氏曰如此則夫堂弟不瞑目二姪亦難爲人夫從不從自在我耳待之如初現年六十五

馬氏張遇妻年十九夫亡守節孝事舅姑撫姪爲子嚴而有法張氏李宏道妻年二十七夫亡家極貧翁姑憐其無出欲令他適氏以死自誓紡績度日撫姪孫爲嗣

嚴氏郝鳳鳴妻年十九夫亡氏卽截髮棺中以矢志織紵自力事翁姑撫孤子至翁姑歿賃衣營葬盡禮盡哀八十七而卒子莊娶張氏方十八不及事翁而事姑倍謹六年張亦寡撫遺孤旣成室又僅七年而亡氏上念姑之早寡下撫媳之無夫艱辛

朝邑志卷六

五十

備歷貞節逾堅今年六十有四固由天姿貞靜亦其觀感于姑者深也

溫氏嚴玉早妻年二十寡舉子方四月紡績撫孤五十餘年鄉隣罕見其面

李氏王述妻青年守節紡織事孤撫姪爲子

劉氏張素含妻年十八夫亡上念翁姑鍾愛而孝益篤隱痛所天早逝而志彌貞

張氏王步青妻年二十四歲夫亡守節孝事翁姑

韓氏鄧子龍妻年二十孀居守節堅貞言笑不苟督學稽 旌  
其宅

糜氏茹茂妻年二十夫亡遺腹在身誓曰天不絕茹氏生男否則願以身殉已而舉一子苦節四十九年

王氏趙有肅妻年二十六夫亡撫孤延嗣艱苦備嘗

張氏雷育萬妻年二十二寡有姑無依或言無可守者氏曰非不能相從地下柰姑老何緝紡自給撫姪爲子無何子夭備嘗艱辛奉姑維虔者四十年姑歿喪葬如禮後依母氏居歲時必躬親祭奠雷爾肅贊曰節著矣而孝享有常節苦矣而嫻靜弗張固德教之有自實天性之純良求之偉丈夫中殆從容樂義而非硜節自詡者所可望

郝氏生員安廷鎮妻年十七適鎮兩載夫亡矢志柏舟孝養舅姑撫孤成立

王氏柴從洙妻年十九適洙二十四歲夫亡孝事舅姑和順妯娌教育其子耕而兼讀艱辛萬狀茹苦如甘現年七十七

劉氏雷兆龍妻年二十四夫亡無子母族憐其少而無依欲令

朝邑志卷六

五十一

他適氏以死自誓紡織易粟奉事翁姑自甘艱苦撫姪爲子典衣佐讀不以貧而廢學

張氏于紹堯妻年十六歸于數月夫亡立志守貞不爲容飾奉事翁姑敬順無違母兄以其少令改適氏誓以死

李氏邢重文妻年二十七夫亡無子以翁姑老而獨立志守節紡織奉養其兄常勸之嫁請于翁若有逼意氏聞以死自誓由是不與兄往來者數十年翁歿貧愈甚姑愈老氏以汲水推磨度日養姑無懈志

趙氏歸于貴妻王氏席忠厚妻俱青年夫故貧無立錐立志撫孤不辭艱苦

趙氏賀喜麟妻于歸日賀病已劇成禮未逾時夫亡氏撫尸哭泣畢卽易服家人憐其少時勸之改醮氏曰命也卒不從取姪

子炬爲嗣至今守節三十四載

李氏樊譽妻年二十四夫亡痛不欲生以姑衰老子襁褓遂矢志守貞家貧紡織爲活後姑歿子殞復撫孤孫樊氏賴以不絕席氏李秀妻年二十四夫亡煢煢一身立志守節至寄食孤貧而冰操凜凜

高氏周丕祥妻年二十四夫亡欲身殉以子幼無依立志守節李氏白汝時妻年二十二歲夫亡以遺孤甫二齡翁姑皆年邁矢志守節不辭勞苦

段氏董慶妻張氏雷之美妻皆青年守節順事翁姑至老弗懈孫氏李藹妻年十八夫亡撫孤茹苦今五十三歲

王氏楊光宗妻張氏蔚映體妻趙氏趙君寵妻俱早年夫故食貧守節

朝邑志卷六

五十二

楊氏穆宏資妻年二十七夫亡家貧紡績奉翁孀居三十八年王氏韓志正妻年二十四夫亡子二歲氏苦節奉養祖翁姑並翁姑撫子成人

王氏上官敬止妻年二十夫亡子二歲紡績以奉翁姑子又亡撫孤孫成人

劉氏上官思賢妻年二十四夫亡守志撫堂姪爲子後子亡清操彌固

上官氏閆武新妻年二十三歲夫亡家貧不能舉火氏紡織事舅姑撫姪爲子

張氏田福洪妻守節堅貞能繼姑景氏之志

劉氏高爾品妻年十九而寡無子姑性嚴兼疑氏之將他適也遇之少恩禮而娣姒因之逼侮尤甚人以爲不可忍而氏委曲

於中饋間卒全其節年今五十力

姚氏党雲顯妻年二十而寡撫從子爲己子家苦貧勤績度日  
貞靜自守今年八十四歲

蒙氏張翱妻年二十餘而寡孤子藐焉尚孩舅性嚴人勸其他  
適氏曰雖爾吾不忍也卒終從一之志年七十而卒

陳氏趙基隆妻歸基隆未三歲而寡前妻子一方齟而家又甚  
窘氏勤績撫子冰霜自矢備受艱辛年九十而卒

謝氏楊汝霖妻王氏謝純嘏妻皆少年孀居守節弗渝

劉氏謝士佶妻年二十七孀居撫姪成立其妹適吳國柱年二  
十而寡亦無子撫姪焉邑令皆旌其門

穆氏孟希統妻年十九孀居子甫二歲伶仃無依氏冰玉自矢  
勤績度日年今七十有一

朝邑志卷六

五十三

楊氏石清計妻年二十四孀居取猶子撫之如己出年七十有  
一而卒

楊氏石雍妻年二十一孀居遺孤方六月貧乏無以自存或有  
勸其再醮者楊涕泣數日不食曰寧身受困苦不忍石氏之無  
後也遂奉孀姑撫幼子依母家就食鄜州現年五十有八

趙氏蒙彦章妻年二十一歲而嫠居誓不再醮事舅姑甚謹撫  
猶子躬勤紡績家資漸厚及孫與曾孫皆幼失依氏撫育成立  
張氏王孟標妻年二十二夫亡遺孤二歲矢志守貞家貧鬻奩  
具勤紡績以事翁姑撫幼子翁姑歿夫弟欲陰害其子使氏無  
所依因得賣氏以自肥氏知之凡搬柴運水一以身當不令其  
子暫離常有十數日不啓門者族里無不傷感

郝氏白儼妻年十六夫亡翁姑傷其少寡不欲強之守氏以死

自誓婦道愈謹迨翁姑繼逝所遺夫弟妹方數歲氏撫育辛勤  
嘗竟夕紡績不眠撫姪爲嗣今年七十有一

張氏生員嚴代妻年十八夫亡孝事翁姑數年相繼逝夫弟方  
十餘歲氏令就學及長成家生子夫婦早逝氏撫姪爲子未几  
子媳俱亡復撫姪孫爲之取婦乃不久而姪孫夫婦又早世撫  
遺孤曾孫四世零丁一身獨苦而貞節愈堅現年六十有八

岳氏王雅懷妻年二十二夫亡紡績事翁姑鄉人以孝稱撫姪  
爲後拮据五十七年

李氏王科臣繼妻歸年十八四年而寡甘貧守節撫前室子卒  
年五十七歲

同氏王珮妻年二十夫亡以翁姑年老矢志奉養繼堂姪登鰲  
爲嗣仰事俯育歷十餘年爲登鰲娶袁氏甫一歲登鰲復亡袁

朝邑志卷六

五十四

氏年十七又寡依姑守節繼堂孫用睿爲嗣同氏年七十一歲  
卒袁氏年五十卒雙節並著隣里賢之

李氏蕭瓊妻年十九寡翁姑年老氏誓節奉親撫胞姪恒泰爲  
嗣教養成立爲邑諸生

王氏李進妻年二十四寡甘貧守節績紡度日撫子作模成立  
耿氏程學彥妻年二十七夫亡誓節奉親繼姪紹文爲嗣上事  
下撫娶媳白氏生子甫三歲紹文又死白氏年二十六依姑守  
寡同撫一孤

劉氏席重珍妻年二十五夫亡家極貧舅姑衰老遺腹未生氏  
矢志柏舟孝事舅姑以代子職後生子熊丸畫荻教訓成人苦  
節四十五年卒年七十

韓氏季元柱妻年二十七歲夫亡子克仁甫生六月苦節訓孤

慈嚴兼盡克仁壬申領鄉薦

高氏穆繼寵妻年二十一夫亡家酷貧上事翁姑下撫遺腹子紡績易食不以膝下之哺分堂上之甘翁姑歿出其凍餒所積及子傭工之資營葬盡誠子以過勞嘔血而亡孤孫復多疾氏之遭際愈窮而氏之貞操愈勵現年八十有一

周氏仇廷珍妻年十八夫亡誓志守節代夫盡孝翁姑已嘗并日爲食而奉養未有不謹遇病扶掖起居親嘗湯藥歿則喪葬中禮撫姪爲嗣教訓恩勤鄉人以孝慈並稱現年六十有六張氏李丕顯妻年十七夫亡孤子尚孩家無人依母氏居母氏勸之再醮則大怒返遂終身不復至母家苦節撫子至於成立年近九十而卒縣令楊特表其閭其孫婦党氏孀居時年二十餘孤子方晬當是時李氏同爨者三十餘口遭大疫亡者二十

朝邑志卷六

五十五

餘人惟存白髮舅姑暨垂死之公而已氏鬻衣質屋爲二十餘人營葬事而其舅與兄公又俱死乃盡所餘田屋典賣之其姑復以憂傷失明氏仰事俯育日夜紡績凡奩中所有無不易以供饘粥孤子稍長卽令就外傳曰吾家世爲儒不可以貧墮氏今年六十有二

董氏侶誌妻年二十歲夫亡孝養翁姑撫族姪爲子教育成人年八十八歲卒苦節六十八年

劉氏韓恒和妻年二十一夫亡誓從地下家人環守之越三月餘乃語家人曰吾以舅姑故勉作未亡人矣今六十有五

李氏薛景端妻年二十餘喪所天不櫛沐者半載髮際虱出姑見而惡之遂復櫛沐姑性嚴而得篤疾氏事之惟謹一食稍迂卽終日不食凡十有餘年如一日焉年六十一而卒

韓氏武振業妻年十九歲而寡家屢空事孀姑以孝已嘗枵腹終日隣婦見其面有飢色欲以升斗助則曰吾適有疾耳其守志如此年今六十有二

韓氏楊來春妻高氏楊應春妻俱二十歲孀居撫育遺孤備嘗艱辛而娣姒相得如姊妹今皆七十有一

靳氏梁朝森妻年二十三而寡無子女鰥翁垂老以哭子成疾臥床一十二載氏守節奉養今已五十年

何氏高景才妻年十九寡無子守節今六十九歲

董氏侶誌妻年二十而寡孝養舅姑撫姪爲嗣卒年八十有八  
賢媛

明

屈氏五泉子韓公邦靖妻華陰都御史屈直女也生十餘歲其

父課諸兒讀經史安人刺繡其旁竊聽背誦通曉意義汝慶髻年以神童名弱冠舉進士與安人稱雙璧詩文倡和如良友焉汝慶早歿安人後十四年而歿有女小字異女嫁秦王子痛其父母繼亡父集旣梓而母詩不傳以書貽澣西康太史之女爲母詩乞序其詞酸楚願藉皮爲褚削骨代穎以傳母集太史感而爲之序謂有女如異五泉子未爲無子也

雷世濟妻韓氏恭簡公女夫以子士楨爲諸生不肯應保長爲署官張銘杖死氏與士楨屢控臺司銘進士降官主者皆其黨友卒不得直士楨嘔血幾死氏謂之曰父冤所以不得雪者彼爲進士故也汝能爲進士庶可因爲經紀家政令士楨專意問學年三十成進士卒爲名臣而銘前以疽發背死矣

國朝

生員麻出表妻張氏內則修潔壽百歲康熙四十七年乃歿談明萬歷以來事皆有條理子孫繁衍蓋福德渾圓者知縣王報春繼妻侯氏報春居官清白家無餘貲其亡也遺子鵬翼鵬程方在穉齡氏紡織佐讀和丸教子卒亦雙桂聯芳茹荼四十載壽七十而終海寧陳元龍撰墓記以表其賢生員馬廷對母關氏夫早亡寄居母家力貧織紵教子成名趙氏馬福義妻郝氏馬福智妻妯娌也事翁以孝聞義智有微嫌欲分炊二氏勸之不聽乃陽從之而饗殮薪米仍若未析時且常以古人友愛事相感動義智因復合爨自是內外益雍肅家事隆隆起相聚六十餘年

劉氏張好慎繼母少孀前妻子三人少者方數歲親愛之如己出未幾天其妻育遺腹子亦旋亡氏推燥居濕茹苦吐甘極撫

朝邑志卷六

五十七

字之艱

秦氏朱可立妻有從姑 生而亡氏泣曰是予之責也雖叔庸辭嫌乎因撫而字之卒皆成立後二子奉氏如母氏曰予汝嫂耳而二子弗能改也

浣衣義婦者雙泉鎮吳氏媪也浣於渠有遺橐焉其孫方幼拾以視媪媪曰他人物也不可動須臾有人涕泣至謂橐中銀數十兩不足惜有公文脚契數紙此不可得則死杖下矣媪語客勿憂橐固在此其人檢視橐固未動也欣然拜謝而去

郭氏韓執魏妻爲夫繼室撫前室子如己出及已有子前子震夫婦多病氏私禱願以己子代其死氏卒子震登副車墓生瑞草人以爲德愛所感云

張氏楊三平妻性嚴潔知大義事舅姑能執婦道歲侵氏嘗乏

食累日而堂上甘旨不少減年四十孀居家貧諸子皆幼弱姑復老病氏紡織奉養造次未嘗失禮撫諸孤慈而有法各授以業而嚴課之家計漸以不窘年八十餘猶勤女工執婦道諸姪子孫來省者未嘗不肅容見之以紡績勤勞爲諸婦先孫卿雲舉於鄉識者以爲賢孝之澤焉

朱氏王銀妻生有順德識大體夫商於外氏克兼子職君舅以名門裔賔從絡繹兼妾母度孽紛紜參差氏一身周旋其間事上待下井井有條康熙辛丑歲祲家啖糠粃祖姑及舅食必異糗嘗典衣市肉不私其子後舅病且劇侍者率不當意氏輟婦功侍湯藥扶起臥者五閱月目不交睫者數十日祖姑年百歲齒落無餘每飯必請所食食必適口數十年如一日也七十以前未嘗晏起年至八旬猶績紡不輟嘗教子天衢曰王氏自參

朝邑志卷六

五十八

知以來六世衣冠爾母以貧故忘先人之業也其賢如此卒年八十二

雷氏張著妻性賢淑人未見其疾言遽色著父宏慶有學行笑言不苟繼母劉家法嚴整家人憚之氏以孝順敬事爲妯娌先著常在外氏親操井臼每日早起櫛沐畢立意下候安否舉按進食倚門外食已乃退劉稍不懌輒涕泣踧踖不寧責之惟俯首謝過卽因他人怒亦必下氣怡色婉言以解之顏霽而後已三十餘年內外無間言